



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



tiryimiyim@aolima



tir yimiyim

TAPAK 8



Election agitsü kecha aritepa mali: Gabon coup lenir

Spain nunger defender Jordi Alba international asaya nungi anenogo



VOL. XX NO. 322 (ADOK 322) DIMAPUR AMUNGNÜ (SUNDAY) RONGJUI (SEPTEMBER) 03, 2023 ₹ 5.00

Tir Murmu-i National Teachers' Award agütsütsü

New Delhi, September 2, 2023 (Agencies): India Tir Droupadi Murmu-i September 5, 2023 nü tesayur 75 nem National Teachers' Award 2023 agütsütsü.

Iba sentong ya Vigyan Bhawan, New Delhi nung agitsü.

Kümshia India nung September 5 anogo National Teachers' Day amonger aser iba ya Dr. Sarvepalli Radhakrishnan tasoba anogomung lir.

Linük nung tesayurtemi shilem tajung agiba, bendanga agüja inyakba, shisaliok jenjang tajungba kümdaktsüba aser kaketshirtem taküm nung temelenshi bentsür aruba atema National Teachers' Award agütsür.

Iba Award nung kulikaket ka, Rs. 50,000 senpet aser silver medal ka

dena lir. Iba sempet anurtem Prime Minister den ajurutepa sensaksemtsü maongka angur.

Teachers Day nung Department of School Education & Literacy, Ministry of Education ajanga National level sentong ayonga agir aser iba ya linük nung tesayur tajungtiba nem National Awards agütsütsü atema lir.

Taküm nungi National Teachers' Award nung Department of Higher Education aser Ministry of Skill Development & Entrepreneurship tesayurtem adener.

Taküm school tesayur 50, Higher education tesayur 13 aser Ministry of Skill Development & Entrepreneurship tesayur 12 nem National Teachers' Award agütsütsü.

Kuki Inpi-i yimten latettsü akhanger

Imphal, September 2, 2023 (Agencies): Honibarnü Manipur kübok Moreh nung Kuki-Zo nunger 4,000 tema adenshia mener lungkak aitogo.

Iba sentong ya Kuki Inpi, Tengenoual District (KIT) ajanga ayongzük aser parnoki Manipur nung tensa majungba atema yimten telatetba ka meshia lungkak ait.

"Yimten melateti Moreh jila nung Meitei nunger lidaktsütsü merangba Kuki-Zo nungeri magizüktsü" ta KIT otongdar Kaikhohal Haokip-i ashi.

State sorkar indang policy tamajung anema iba lungkak aitba sentong agir ta paisa ashi.

Manipur nung kin o kin tsüingda rara adokba sülen Meitei nunger 3,000 temai Moreh jila toksür jena ao.

Kuki-Zo nungeri political solution ka aginür aser iba ajanga mangatetep tera agientsü aser Manipur nung kin ajak temeten kümzüka ayutsü ta Haokip-isa metetdaksü.

Yimten latetba sülen ang Moreh nung Meitei nunger tanaben lidaktsüsüla ta paisa ashi.

North Eastern Skill Development Conclave agir

Guwahati, September 2, 2023 (Agencies): Guwahati nung anogo asemnü North Eastern Skill Development and Entrepreneurship Conclave tenzüka agidar.

Hokolbarnü Union Minister of State for Skill Development and Entrepreneurship (MSDE) and Electronics and Information Technology Rajeev Chandrasekhar aser Union Minister of State for Education and External Affairs Rajkumar Ranjan Singh nati iba sentong tenzütsü.

Iba Conclave dang 'Manthan 2023' ta ajar aser iba sentong ya North-East India nung Skill and Entrepreneurship asadangtsü atema agir ta Union Minister Chandrasekhar-i ashi.

Iba sentong ajanga ministry tem, state sorkartem, shisashirtem, industry teloktem, rejutem, policy yanglurtem, corporations aser tongtipangsa beneficiaries sendakteptsü, ta pai ashi.

Iba Conclave ajanga North-

Eastern region nung MSDE alizüing lemsateptsü aser iba ajanga entrepreneurship o skill renloktsü ta paisa ashi.

"Prime Minister Narendra Modi lenisüba ajanga India renlokba nung North East adener" ta Union minister of state for education and external affairs Singh-i ashi.

PM Modi indang 'Ashtalakshmi' alizüing ajanga state 8 melenshitsu aser India GDP nung shilem tajung agirtem asütsü, ta paisa ashi.

Conclave tenzüka anogo nung MSDE ajanga residential skill training programmes tenzütsü. Itemji electric vehicle service technicians, solar panel installation technicians aser electrical technicians atema lir.

Northeast state 8 nungi local artisans, craftsmen aser local nano entrepreneurs 80-i yanglutetba products 250 tema exhibition ka Union Minister of State anati lapoktsü.

Assam tzmetsung nung nisung 18 süogo

Guwahati, September 2, 2023 (Agencies): Assam nung tzmetsung ajanga nisungtem timtemba manener aser tanü Darrang district nung nisung ka asü. Iba nisung züingsema taküm tzmetsung nung asür 18 kümogo.

Tzmetsung ajanga nisung 242,515 timtemer aser Dhubri, Goalpara, Guwahati, Tezpur o Neamatighat nung Brahmaputra dena ayong aika nung danger level adena tzu ayimer.

Tzmetsung ajanga district 18 kongshia lir. District temji Barpeta, Biswanath, Chirang, Darrang, Dhemaji, Dhubri, Dibrugarh, Goalpara, Golaghat, Jorhat, Kamrup, Kamrup (Metro), Lakhimpur, Morigaon, Nagaon, Nalbari, Sivasagar aser Sonitpur lir.

Tzmetsung nung yariteptsü atema tesem balala relief camps aser center 50 tashi lapoka lir. Tang nisung 2,169 tashi relief camps nung jenoka lir.

District Hospital Dimapur ya Referral Hospital akümstsü



September 2, 2023 nü District Hospital Dimapur nung Minister Paiwang Konyak-i medical ketdangsurtem aser Doctor tem den senden amenba angur (DPRO Dimapur)

Dimapur, September 2, 2023 (DPRO): District Hospital Dimapur (DHD)-i tanga district hospital tem yaritsü atema Referral Hospital ka ama akümstsü ta Health & Family Welfare Minister P Paiwang Konyak-i metetdaksü.

September 2, 2023 nü DHD nung CMO, MS, Doctors aser medical staff den senden ka amendang Minister Paiwang-i iba osang ashi.

"DHD nung infrastructure,

nübo aser tanga nungdakattem agütsütsü. Kobi melii DHD nung doctor tajungtibatem aser super specialists mapa lemsüktsütsü" ta pai ashi.

"Nagaland nung doctors/medical officers reshuffling aser rationalisation yakta inyaktsü. Administration aser police ama transfer aser posting küm 3 atema dang asütsü aser medical department nung inyakertemi tesem mashii ka nung inyaktsü

mulungtsüla. Transfer aser postings dak sendakba shidi kecha magizüktsü" ta Minister Paiwang-isa ashi.

DHD nung CMO aser MS nati nungdakattem lemsatepsa sülen Minister Paiwang-i Forensic expert ka mapa lemsüktsütsü aser nübo akangshitsu nangzük.

DHD nung doctors aser medical staff-i Covid wara mapang bendanga agüja tenzüka atema paisa tenüngsang agütsü.

NSF ketdangpur menden melentepba sentong agiogo

Kohima, September 2, 2023 (TYO): Honibarnü Naga Club building nung Naga Students' Federation (NSF) ketdangpurtem menden melentepba sentong agiogo.

"Tesüiba kümük nung onoki Naga nunger aser talisa kaketshirtem atema temulung süa inyakogo. Tayongzükba jenti ajuruaka Naga nunger teyari ajanga item mapa inyaktetogo" ta NSF tir menden nungi alur Kegwayhun Tep-i ashi.

Tesüiba kümük nung state sorkar dang Grade C post atema Nagaland Service Selection Board (NSSB) tentettsü rongshiba aser NSSB tatidang nung viva-voce component 12.5% nungi 5% ajemtsüba maparen inyakogo, ta pai ashi.

"Oting lendong atalokba sülen NSF-i Naga nunger alidak nungi AFSPA agientsü atema takhangba agüja aru. State assembly special session ka jazüka AFSPA onük olemtep akhangba telokji NSF dang liasü aser state sorkari special session agiba sülen police station kar nungi AFSPA agienba atema tenüngsang agütsür" ta Tep-isa ashi.

NSF-i maneni Naga lima nungi AFSPA agientsü atema takhangba agütsütsü ta paisa shisem.

May 27 nü NSF office raksatsüba atema temulung shiranga olen ka lemsatepdang "Naga nungeri iba onük atema obendang agütsütsü yutsür" ta Tep-i ashi.

Paisa Naga nunger aser lokti

tentet balala longjemer iba tebilemsü koktettsü atema mepishia metetdaksü.

Taoba NSF tongti tezülur Siipuni Ng. Philo-ia o jembidang "Oting lendong atalokba sülen NSF-i Naga lima ajungalen nungi AFSPA agientsü atema bangzüngtep" ta ashi.

"Iba ya meinyak tashi Naga kaketshirtemi Indian armed forces aser paramilitary forces den amalitep malitsü bangjemtepa lir aser NSF ketdangpur taseni iba mapa maneni inyaktsü" ta paisa ashi.

NSF-i nisung ajak adenba aser ajaki agizükteba lemtet ka agitsü meranger. NSF indang alizüingji Naga linük asenok sasa ketdangsüa alitsüba lir, ta Philo-isa ashi.

"June 11, 2022 nü NSF-i nisung aika den külemi Jantar Mantar, New Delhi nung "A call for peace" yimiyim ayimoktsü aser Prime Minister Narendra Modi dangi memorandum ka zülü. Naga nunger teimtiba adenshibaji iba sentong ya ka liasü" ta paisa ashi.

Manipur nung tensa mejungaka Ukhrul, Manipur nung 30 buha General Conference takok ngua mongogo. August 24 nungi 26 tashi "Solidarity beyond borders" omen nung ajemdaker Tangkhul Katamnao Saklong (TKS) ajanga ketdangsüa mungdang among aser nisung 2500 shi ka aden, ta taoba NSF tongti tezülur Philo-isa metetdaksü.

Taküm May ita NSF office

raksatsüba sülen Kegwayhun Tep-i aniba NSF ketdangpurtem kümük ita 3 atsülangja liasü.

Tanü menden nungi anenba NSF ketdangpurtemi NSF küm 775 ajungba benjung ayonga among, 2010 & 2013 SSA-RMSA tesayurtem state service nung aniok, Nagaland In-service Doctors Association superannuation onük anema noktak aser Manipur nung kin o kin rara nung kaketshirtem yariogo ta Philo-isa ashi.

NSF mungdang nung India kübok state pezü- Assam, Arunachal, Manipur aser Nagaland den Myanmar nungi Naga kaketshirtem aden, ta paisa shisem.

NPF tir tasen Medovi Rhi ya tesüiba kümük nung education secretary inyaka liasü. Pai o jembidang Tep-i anir ketdangpurtemi takok ngua inyakba atema tenüngsang agütsü.

NSF ketdangpur taseni maneni Naga nunger atema meranga inyaktsü, ta pai ashi.

NSF aser Angami Students' Union (ASU) tsüingda NIDA superannuation onük atema mangatetep aliba atema asüingdangdang "ASU ya NSF indang federating units tashitaitba rongnung ka lir saka mangatetep ka adoka parnok onok meyariba atema sasar" ta Tep-i langzü.

"Ajisüaka NSF ketdangpur tasen aser ASU longjemtsü aser külemi ajak ajungtsü atema inyaktsü imlar" ta paisa ashi.

Tseminyu nung National Lok Adalat indang sentong ka agi



Tseminyu nung National Lok Adalat indang sentong nung tangokba noksa angur.

Tseminyu, September 2, 2023 (DPRO): Tseminyu District Administration den yaritepa Kohima District Legal Services Authority (DLSA) ajanga Legal Awareness sentong ka agiogo.

Tseminyu District nung National Lok Adalat nung Tseminyu Deputy Commissioner Dr. Tinojongshi Chang, NCS-i o tatsüka jembidang Legal Services timi amshitsü ayongzük.

Paisa sentong nung adentem dang pei pei colony, yimtsüng aser nübotem dang Legal Services indang osang

metetdaksütsü ayongzük.

"National Lok Adalat ya küm shia pezüben agir aser iba ya makamaitertem aser lokti nung teküpoktiba jenjang nung alirtem ajangzüksü atema agir" ta Kohima DLSA Panel Lawyer Mhayani-i ashi.

Lok Adalat ajanga ken o aika den bank loan recovery, debt recovery, water and electricity bills (excluding theft cases), matrimonial cases, MACT cases, petty offense cases amala civil cases temeten agütsür aser timi angatetteper ta Mhayani-isa metetdaksü.

Sentong nung Kohima DLSA Panel Lawyer Nonguzo Tase-i district tem nung Free Legal Aid Services agütsüba aser inyaksangshi metetdaksü.

Iba sentong nung EAC Tseminyu Town, Roko Angami NCS-i tesentepertem pelaa agizük aser Tseminyu District kübok village councils nungi GBs, Chairmen aser züngsemtem aden.

Sentong nung mendenji Kohima DLSA Panel Lawyer Nagali Shohe liasü aser Chief Legal Aid Defense Counsel Keduvi Zhotso-i anküp tepela o jembu.

15 buba Native Trax Society Music Awards alitsü

Dimapur, September 2, 2023 (TYO): Native Trax Society (NTS) ajanga 15 buba Music Awards of Nagaland (MAN) 2023 alitsü osang sangdongogo.

Iba atema NTS-i artists, recording studios, producers mesüra parnok atema teshimtet nübotemi September 1, 2022 nugi tenzüker tang tashi nung Nagaland nung original compositions record asüba agütsütsü metetdaksüogo.

"Local music industry nung musicians aser mapa inyakerkem ajungkettsü atema Music Awards of Nagaland (MAN) agir" ta tayongertemi sangdong ka nung metetdaksü.

Music Awards of Nagaland indang Facebook page <https://www.facebook.com/musicanagaland> mesüra WhatsApp number-7005251186 ajanga Entry Forms aser rules angutsü akok.

Tenüng agütsür ajaki

musicanagaland@gmail.com dangi email, WhatsApp ajanga 7005251186 mesüra The Barcode Restro, CBZZ Bulding, 4th floor, Greenpark junction nung agütsütsü akok.

Artistes/bands-i ken ka dak tali mesüra telemsa balala nung agütsünüra entry forms balala amshitsüla. Ajisüka artiste/band shia maximum 3 entries dang alitsü ta tayongertemisa ashi.

September 25, 2023 tashi nung tenüng agütsütsüla aser 7005251186/ 9366318346 ajanga tongteprateptsü akok.

Entry shia nung item ya alitsü: A signed and filled up entry form; An audio song/music video (or the audio/video link); Lyrics in MSWord or text document format. Entries in Hindi/ local dialects should include an English translation; and Artist/Band profile (MSWord or text document format) with a photograph.

Noklak nung Beti Bachao Beti Padhao tenzük

Noklak, September 2, 2023 (DPRO): September 2, 2023 nü DC Office Complex nung Beti Bachao Beti Padhao (BBBP) Noklak tenzükogo.

Noklak Deputy Commissioner Arikumba-i o jembidang BBBP indang alizüngtem metetdaksü.

Paisa sendaktepa alirtem dang scheme takok ngua inyaksü atema amalitepa yariteptsü ayongzük.

Sentong nung Noklak Sub-Divisional Officer (Civil)

Vikhoto Richa-i district nung BBBP indang action plan lemsatop.

Noklak district nung osang prokshitsü, tetsürtem shisaliok ajungkettsü, skill development ajanga tetsürtem tashi itdaksütsü aser healthcare access tajungba kümdaksütsü ta Richa-i ashi.

Paisa BBBP Noklak kübok Meritorious Achievers atema Late Supou Memorial Award tenzükba osang metetdaksü.

Kümshia iba award ya

Noklak district nungi Class 10 aser Class 12 nung takok tajung anguba tetsürtem nem tetushi agütsütsü.

Sentong nung District Hospital Noklak Medical Officer Dr. Chongnya aser CDPO Noklak Bendangsunep natia o jembidang department balalai tetsürtem asoshi scheme balala inyakba osang lemsatop.

Iba sentong nung mendenji EAC Noklak Kathyinla liasü aser GHSS Noklak nungi Tsuliam ajanga ken ka aten.



MLA Dr. NeisatuoMero-i Government Hr. Secondary School Pftusero nung Science stream lapoktsüba sentong nung tangokba noksa nung angur.

<p>बैंक ऑफ बड़ौदा Bank of Baroda</p>	<p>DIMAPUR BRANCH Nyamo Lotha Road (Church Road) Dimapur- 797112, Nagaland, Email: dimapu@bankofbaroda.com</p>	<p>KIOJEN AYOKTSÜ ATEMA NOTICE APPENDIX- IV-A [See proviso to Rule 6 (2) & 8 (6)]</p>		
<p>Securitisation & Reconstruction of Financial Assets and Enforcement of Security Interest Act, 2002 den külemi Security Interest (Enforcement) Rules, 2002 indang proviso to Rule 6 (2) & 8 (6) kübok Kiojen ayoktsü atema E-Auction Sale Notice. Public aser talisa sen apur (tem) aser Guarantor (tem) dang, Secured Creditor, Bank of Baroda, Dimapur Branch, Dimapur, Nagaland den mortgage asüba tsünglanglen shia aliba kiojen Authorised Officer of Bank of Baroda, Dimapur Branch, Dimapur, Nagaland, Secured Creditor-i tsünglanglen shia aliba sen alangzüksü atema "kiojen aliba tesem", "yangji aliba ama" aser "yangji aliba ajak" ayoktsü sangdonger.</p> <p>Sen apur/tem / Guarantor/tem / kiojen/tem sentsüh / Reserve Price / e-Auction anogo & mapang, EMD aser Bid ajungketba sen osang tejangja tsüngnglen agütsür:-</p> <p>Agidokba jenjang: Physical</p> <p>Kiojen rebrandnganba anogo aser mapang: 15.09.2023 & anepdang 10:30 ako nungi nikongdang 4:00 ako tashi</p> <p>Sentsüh ajak senteper: 22.12.2021 anogo tashi nung Rs.1,20,74,427.74 (Rupees One Crore Twenty Lakhs Seventy Four Thousand Four Hundred Twenty Seven and Paise Seventy Four Only) aser iba denji külemi sen tetemlok aser tanga charges.</p>				
Sl. No.	Name & address of Borrower/s / Gurantor	Kiojen aser osang tejangja	Date & Time of E-Auction	Reserve Price, EMD amount, Bid Increase Amount.
1	<p>1. MR. SUBASISH DAS (BORROWER) Proprietor of M/s. New Zoom Colour Lab, T. S. Market, N L Road, Dimapur, Nagaland State- 797112.</p> <p>2. MRS. SARBANI DAS (CO-BORROWER) House No.11, Sematilla Colony, Dimapur, Nagaland State- 797112.</p>	<p>Block No.8, Mouza No.3, Dimapur nung Shri Subasish Das, S/o Himangshu Ranjan Das tenüng nung Patta No.629, Dag No.13/730 kübok aliba ali tasazük 1B-00K-00L (14400 Sq.ft.).</p> <p>Bounded By:- North:- Huwato Chishi, South:- Colony Road/Link Road, East:- Sontosh Malakar, West:- Khehuto Kiba</p>	19.09.2023 1:00 pm to 3:00 pm	Rs. 1,31,40,000.00 Rs. 13,14,000.00 Rs. 1,00,000.00
<p>Kiojen ayoktsü telatetba osang tejangja atema iba link nung agüja lir- https://www.bankofbaroda.in/e-auction.htm and https://ibapi.in</p> <p>Date: 03.09.2023 Place: Dimapur</p> <p style="text-align: right;">Authorised Officer Bank of Baroda, Dimapur Branch</p>				

<p>बैंक ऑफ बड़ौदा Bank of Baroda</p>	<p>CIRCULAR ROAD BRANCH Ground Floor, Faith Building, Near Kharmahal Traffic Point, Dimapur, Nagaland- 797112, Email: vjdima@bankofbaroda.co.in</p>	<p>SALE NOTICE FOR SALE OF IMMOVABLE PROPERTIES APPENDIX- IV-A [See proviso to Rule 6 (2) & 8 (6)]</p>		
<p>Securitisation & Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rule 6 (2) & 8 (6) nung ajemdaker E-Auction ajanga kiojen ayoktsü notice.</p> <p>Public aser talisa sen apur (tem) aser Guarantor (tem) dang, tsünglanglen shia aliba kiojen, koba Secured Creditor, Bank of Baroda, Circular Road Branch, Dimapur, Nagaland dang mortgaged/charged süa liasü, ibaji Authorised Officer of Bank of Baroda, Circular Road Branch, Dimapur, Nagaland, Secured Creditor-i agiadokogo aser tsünglanglen shia aliba senotsü alangzüksü atema iba kiojenji "Kong koma ali", "Koma lidir yamaji" aser "Yangji aliba ajak" ayoktsü. Sen apur/tem / Guarantor/tem / Secured Asset/tem / sentsüh / Reserve Price / e-Auction anogo aser mapang, EMD aser Bid Increase asüba senji tsüngnglen shia lir:-</p> <p>Status of Possession: Physical</p> <p>Property Inspection anogo aser mapang: 25.09.2023 & 10:30 AM nungi 4:00 PM</p> <p>Sentsüh ajak agi: 29.12.2021 anogo tashi nung Rs.1,11,10,006.32 (Rupees One Crore Eleven Lakhs Ten Thousand Six and Paise Thirty Two Only), iba dak alia sen tetemlok aser tanga charges adentsü.</p>				
Sl. No.	Name & address of Borrower/s / Gurantor	Detailed description of the immovable property with known encumbrances	Date & Time of E-Auction	Reserve Price, EMD amount, Bid Increase Amount.
1.	<p>1. MR. CHINNY MAGH (BORROWER) House No.208, Industrial Village, Razhuphe, Dimapur, Nagaland State- 797112.</p> <p>2. MRS. NAOMI MAGH (CO-BORROWER) House No.208, Industrial Village, Razhuphe, Dimapur, Nagaland State- 797112.</p> <p>3. MR. SENILO MAGH (GUARANTOR) S/o Chinny Magh, H/No. 208, Industrial Village, Dimapur- 797112, Nagaland.</p>	<p>A land measuring 0B-1K-18L and building thereon situated at Padumpukhuri, Dimapur covered by Patta No.1202, Dag No.295/1671 standing in the name of Shri Chinny Magh, S/o Late Ashiwa Magh.</p> <p>Bounded by:- North: Plot of Lanu Ao, South: Approach Road, East: Plot of N. Konyak, West: Plot of Bohovi Awomi.</p>	29.09.2023 1:00 pm to 3:00 pm	Rs. 58,55,000.00 Rs. 5,85,500.00 Rs. 50,000.00
<p>Telatetbatem aser osang tejangja agüja aliba link nung angutsü https://www.bankofbaroda.in/e-auction.htm and https://ibapi.in</p> <p>Date: 03.09.2023 Place: Dimapur</p> <p style="text-align: right;">Authorised Officer Bank of Baroda, Circular Road Branch</p>				

Sangtam nunger den Mongmong salem abener

Dimapur, September 2, 2023 (TYO): Sangtam nunger adianutem den Mongmong benjung salem abener ta Governor La Ganesan-i metetdaksü.


Mongmong benjung ya alu junga arohba atema tenütsang agütsüba benjung ka lir. Iba benjung ya tulusang nungi temoatsü aser azükaru meshiba mapang ka lir ta Ganesan-i ashi.

"Mongmong benjung nung kinunger aser temeimer aser medemertem semdangteper aser lokti nung anema alitsü aser telongjem atema chiyungteper" ta Governor-isa shisem.

Sangtam Naga nungeri Mongmong benjung amongba salem osang abener ta NSCN/GPRN-i sangdong ka nung metetdaksü.

Mongmong benjung nung ki tsüngrem aser mimong nung sorochiokba lung asem külemer, ta MIP (Ministry of Information & Publicity) NSCN/GPRN (Akato Chopi) ajanga metetdaksü.

Sangtam nunger madak azükaru aser tia tajung maneni liangma ta NSCN-i Tsüngremer temoatsü meshitsür ta MIP sangdong nungsa shia lir.



September 02, 2023 nū Raipur nung Union Home Minister Amit Shah-i Chhattisgarh nung Congress sorkar anema 'Aarop Patra' sayatsüdang tangokba noksa nung angur.

'One Nation-One Election' atema sorkari committee ka tentetogo

New Delhi, September 02 (Agencies): 'One nation, One election' mapatong asadangtsü atema sorkari committee ka tentetogo; iba committee nung tongtiji taoba mapang linük Tir, Ram Nath Kovind asütsü, ta ketdangsertemi metetdaksü.

Iba committee nung tanungba züngsemtemji- Union Home Minister Amit Shah, Congress lenir Adhir Ranjan Chowdhury, taoba mapang MP Ghulam Nabi Azad, taoba mapang 15 Finance Commission nung Chairman NK Singh, taoba mapang Lok Sabha nung Secretary General Dr, Subhash Kashyap, senior advocate Harish Salve aser taoba mapang Chief Vigilance Commissioner, Sanjay Kothari nung lir.

Sorkari September 28 nungi September 22 tashi Parliament senden temeja ka ayongzükbaba sülen

Brihostibarnü yimatenren lenirtem aser mongintemi o entep tenzükgoko.

Parliament senden nungji

ozüng tasen kar benoktsüa akok, ta aikati bilemer.

Iba senden nungji linük nung senso ajak atema kasa temzüng benoktsü, state assembly elections aser general election kasa mapang ka nung dang agitsü, sorkar nung tetsürtem nem menden tali agütsütsü aser Parliament building tasenba nung G20 group senden amentsü atema jembitsüa akok, ta aikati bilemer.

Sorkari parliament temeja senden ayongzükbaba sentong tejangja memetdaksü, ajisüaka Parliamentary Affairs minister, Pralhad Joshi-i, senden pongu amentsü, ta metetdaksüogo.

Sorkar ketdangser kati, "September 17 ya Ato kilonser (Narendra Modi) asoba anogomong lir aser küm shia pai langka tasen inyaksü apiteter. September 19 anogo ya Ganesh Chaturthi benjung anogo lir aser India nung iba benjung ya kanga temeshi, anungji iba anogo nungji Parliament House anaprong-Lok Sabha aser Rajya Sabha naprong Parliament building

tasenbai belentsüa akok," ta ashi.

'One Nation One Election' ya mezüng 2018 küm Law Commission of India-i benoka liasü. Iba mapatong kübok Lok Sabha aser state Assemblies election khenyongi dang agitsü.

Iba mapang nungji Law Commission of India-i, tang aliba linük temzüng kübok ibaji meinyaktetsü, anungji ozüng tasen agizüktsü nungdaker, ta metetdakja liasü.

Law Commission-isa, khenyongi dang state elections aser Lok Sabha election agiba ajanga sorkar senpong nungi senotsü aika kümzükbaba den külemi ketdangsertem aser security sepaitem mapang talangka nübo atsükba kümzüksü, ta metetdakja liasü.

Khenyongi election külemi agiba ajanga mapang shidak nung sorkar schemes balala benoka inyaktetsü aser election nüboyim atema indokbaji mapang kümzüka terenlok mapa inyakba nung ang mapang tali indoktsü, ta Law commission report ajanga metetdakja liasü.

Balasure train lendong atema railway ketdangser 3 anema ken o benok

New Delhi, September 02 (Agencies): Taküm June ita nung Odisha kübok Balasure district nung train lendong ataloka nisung 300 jungnüa asüba dak sendakba nung Honibarnü Central Bureau of Investigation (CBI)-i Railway ketdangser asem anema ken o benokogo.

July 7 nū CBI-i Balasor district nung senior section engineer (Signals) Arun Kumar

Mahanta, section engineer Amir Khand aser technician Pappu Kumar nung pua liasü aser tang par asemprong anema IPC aser Railways Act kübok Arrla balala nung ajemdaker ken o benokogo.

Tamalen Ministry of Railways-i, iba train lendong atalokba ya North Signal Goomty station nung aliba signalling-circuit-alteration nung

aibelenba ajanga lir, ta metetdakja liasü.

June 2 aonung 7:00 ako meta Balasure anasa passenger train ana aser khu abenba train (Bengaluru-Howrah Superfast Express, Shalimar-Chennai Central Coromandel Express aser khu abenba train) tsüktepba lendong nung nisung 300 jungnüa asü aser nisung 1,100 shi yirua liasü.



New Delhi, September 02, 2023: New Delhi nung G20 senden amentsü joko anogo ishika dang lia security sepaitemi Kartavya Path anükba noksa nung angur. G20 New Delhi senden ya September 9-10 anogotem nung Bharat Mandapam International Exhibition-Convention Centre, Pragati Maidan nung amentsü.

FORM NO.14 [See Regulation 33(2)].

OFFICE OF THE RECOVERY OFFICER - III
DEBTS RECOVERY TRIBUNAL GUWAHATI
Suwarna Bhawan, House No.12, New Town Path, Near Hanuman Mandir, G.S. Road, Ulubari, Guwahati-781007 (Assam)

DEMAND NOTICE
NOTICE UNDER SECTIONS 25 TO 28 OF THE RECOVERY OF DEBTS & BANKRUPTCY ACT, 1993 AND RULE 2 OF SECOND SCHEDULE TO THE INCOME TAX ACT, 1961.
RC/42/2022
State Bank of India
-Versus-
M/S H AND H ENTERPRISE AND ANOTHER AYE

To,
(CD1) M/S H AND H ENTERPRISE AND ANOTHER AYE V HOTOI SO LATE VIYIHO AYE MS H AND H ENTERPRISE PROP SHRI V HOTOI AYE HOUSE NO 138 49 CHEKIYE VILLAGE AQUASH 3RD MILE P O DIPHUPAR DIMAPUR NAGALAND Dimapur-797112
Also At:
M/s. H and H Enterprises, Prop.: Shri V Hotoi Aye, Purana Bazaar, Kohima Road, Dimapur, Nagaland - 797112
(CD2) SHRI V. HOTOI AYE Son of Late Viyiho Aye M/s H and H Enterprises, House No.: 138/49, Chekiye Village, Aquash, 3rd Mile, PO Diphupar, Dimapur, Nagaland-797112

OA/453/2016 nung Presiding Officer, DEBTS RECOVERY TRIBUNAL GUWAHATI ajanga tetuyuba agütsüba kubok Recovery Certificate nung ajemdaker iba notice agüja sen Rs.12368691.57 (Rupees One Crore Twenty Three Lakhs Sixty Eight Thousands Six Hundred Ninety One And Paise Fifty Seven Only) den sentsüh mouma tashi 13.12.2016 anogo nungi ita shia sen tetemlok @ 12.70% aser costs Rs.150000/- (Rupees One Lakh Fifty Thousands Only) shi nai tagütsütsü lir (Jointly and Severally/ Fully/Limited) ta metetdaksür.

1. Amount due as per the Recovery Certificate:	Rs. 1,23,68,691.57
2. Interest from 13.12.2016 to 10.03.2023 @ Rs.12.70%	Rs. 1,48,51,763.83
3. Costs	Rs. 1,50,000.00
TOTAL	Rs. 2,73,70,455.40

2. Iba notice agütsüba anogo nungi anogo 15 tsüngda senji agüjang ta nū dang tuyur, ajimesüra Recovery of Debts Due to Banks and Financial Institutions Act, 1993 aser Rules nung ajemdaker ibaji menoktsü.
3. Taruba ken o mangadangsa affidavit ka ajanga nū meyong kiojentem sangdongang ta nū dang tuyur.
4. Maneni ken o angadangtsü atema nū dang 20.10.2023 anogo nung anepdang 10:30 ako nung tsünglanglen sign süa alir matsüngdangi arutsü tuyur.
5. Tamalen shia aliba sen dak alia nai item ya-a agütsütsüsa akümtsü:
(a) Certificate/execution proceedings indang iba notice agütsüba mapang nungi tenzüka tetemlok agütsütsü.
(b) Sentsüh aotsü atema notice aser warrants agütsüba service aser tanga inyakyim balala nung nung indokba sen aser tanga charges ajak agütsütsü.
Iba anogo: 21.07.2023 nung kü meyongnem aser Tribunal indang seal agütsür.

Recovery Officer- II
Debts Recovery Tribunal Guwahati.



September 02, 2023 nū Sriharikota nung aliba Satish Dhawan Space Centre nungi India nung mezüngbuba solar mission 'Aditya-L1' khakettsüdang tangokba noksa nung angur.

Bank of Baroda
KOHIMA BRANCH
Main Bazar Road,
Kohima- 797001, Nagaland
Email: kohima@bankofbaroda.com

KIOJENAGIBA NOTICE
(For Immovable Property)

Securitization and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Section 13 (12), Rule 3 nung ajemdaker tsünglanglen sign süa alir Bank of Baroda nung Authorized Officer-i 03.08.2022 anogo nung demand notice ka ajanga sen apur **Mr. Hyungwalo Jeshing Rengma, So Mr. H. H. Jeshing dang** notice agütsüba anogo nungi tenzüka anogo 60 tsüngda notice nung shia aliba sen **Rs.1,98,87,471.60 (Rupees One Crore Ninety Eight Lakhs Eighty Seven Thousand Four Hundred Seventy One and Sixty paise)** den külemi **30.07.2022** anogo nungi contractual rates nung tetemlok aser cost, charges den tanga sen agüjang ta metetdakja liasü.

Sen apur senji magütsütet, anungji sen apur aser public dang, tsünglanglen sign süa aliri iba Act nung Section 13 kübok sub-section (4) aser Security Interest (Enforcement) Rules 2002 kübok Rule 8 nung agüja aliba tashi amshia 2023 küm **September 1 anogo** nung tsünglanglen shia aliba kiojen agiadokogo, ta sangdonger.

Talisa sen apur aser public dang iba kiojen dak sendakba kecha inyaksangshi masütsü metetdaksür, kechiyong ibaji **Rs.1,98,87,471.60 (Rupees One Crore Ninety Eight Lakhs Eighty Seven Thousand Four Hundred Seventy One and Sixty paise)** aser tetemok atema Bank of Baroda meyong kümogo, ta metetdaksür.

Note: Sen apur dang Section 13 kübok sub-section (8) nung ajemdaker mapang shidak nung iba kiojen alangzüksü metetdaksür.

KIOJEN OSANG

Agri Colony, Kohima, District Kohima, Nagaland nung Mr. Hyungwalo Jeshing Rengma tenung nung aliba Patta No. 8364 (New) Plot No. 5531 nung ali tasazük 1500 Sq.ft nung aliba kimong aser building:

Artsü:
North tsütsülen: Seyiehol Angami'er kimong, South tsütsülen: Hyungwalo Jeshing'er kimong, East tsütsülen: Nullah aser West tsütsülen: Seyiehol Angami'er kimong.

Place: Kohima
Date: 01-09-2023

Authorised Officer
Bank of Baroda, Kohima Branch



TIR YIMYIM YIMOBILEM (EDITORIAL)

DIMAPUR AMUNGNÜ, RONGJUI (SEPTEMBER) 03, 2023

Lokti nunga Pai repringtetter

Alima nung alir nisung onsara aika aser ano item rongnungji asenok dang nungi tuluba, temetetba aser takarba nisung jentinangka dang lir. Anungji, asenoki aiben asenoksasa kanga ilaa bilemtsüa akok. Aji oda, tangaria asenokji mezüngshitsüa akok mesüra asenokji tangar dang nungi kecha balaka masü ama bilemtsüa akok. Ajisüaka, Tsüngremibo asenok nisung shiaji tangar dang nungi balaka aser tangar dang nungi tongtibangba ta anogo shia repringer. Asenoki Pa dang sarasadembaji asenoki zübazübaa yimya ka ama dang bilemtsüa akok, saka iba sarasademji Pai angashir aser Pai asenok tenüngteta moatsür. Osang tajung Luke tapu 19 nung tatalokba otsü ka yamai shia lir : Kenü anogo Yisu Khrista Yerikoi ooya liasü. Pa sülen anidaker, Pa ajuruner aser Pa repringner nisung onsara aika asünungji, telokti jagi Paji nungbanga yur Zakia-i Yisui tenük agi angutsüa mekoki aküm, kechiaser Laishibai ashir, paji tar tatsü liasü. Aji oda, Zakia atema Yisu ajurutsüabajibo tamakoktsü liasü, saka pai Yisui süia aoba danga ngura, pa atema ibaji mulungsüngzük tuluka asütsüba liasü. Zakia ya yimdong kazür tanur ka masü, pa ya tangar memenepba mashimalu nisung ka masü. Laishibai ashir, pa ya alimelen sarur aser takar nisung ka liasü. Ajisüaka, pa jenjang aser rongsen akabaji pai Yisu ngunüba dang nungi tilaba liasü. Iba tejangraba, taginüba aser tarongba jagi pai tanur ama kümer, Yisu jak repringtsü asoshi süngdongi atu. Tanü tendak asen lima nung nungtugu nisung ka ajanga süiba repringtsü asoshi Zakia ama tulur aser takar kati süngdongi tur ataba asenoki angu nungbo, asenokibo menütsütsü sudi. Ajisüaka, Zakia mulung nung Yisu ngunüba tejangrabaji kenyongi balaka liasü. Aji oda, pai Yisu aotsüba lenmang len jelia orr mungodong jagi tur ataa alidang, pa dang nungibo Yisuiang paji tama angu. Zakiaibo Yisui tangu dang ngurabang, iba jagi temulung asütsüba liasü, ajisüaka Yisui pa dang ashir, "Zakia, yakta along, kechiaser tanü ni nür kidang anentsü." Atangji, Yisui Zakia dang Pa par kidang anentsü ta ashidang, pa temenen pur liasü. Yisui Pa pa tenüngteta jar, Pa par kidang anentsü ta ashiba o ji Zakia atema tesüngmangtsü taochi o ka liasü. Lokti onsara asüba agi tejaka repringtsü mekoki aliba nisung ka kidang Yisu arua anentsü ashiba osangji aika atema tamamangtsü osang ka liasü. Iba jagi aika metsüdak. Ajisüaka, Zakia atemabo ibai Tsüngrem nungi tekümtet anguba anogo ka liasü. Alima nunga takar aser tanüla nunga tekümtet tejangja metetba nisungji Zakia aküm. Zakiai par kidangi Yisu aniketba mapang nung jagi paji nisung kenyongi balaka küma adok. Zakiai Yisu majuru tashibo pa akaba ajakji pa meyong dang ta pai bilem, saka kodang pai Yisu ajuru, pasasa pai pa rongsenji makarterem nem agütsütsü mulungtet. Yisu agizükba temulungjangji ken nung yamaji melenshir. Iba temelenshiji tangari milen sangwa ama angur. Aji oda, Zakia dak inyakba ama tanü Yisui asen taküm aser kibong nung inyaksü mulunga lir. Zakiai Yisu par kidangi mejaok, pai tangudang ngunü, saka Yisui Zakia bilemba dang nungi kanga agia tuluba taochi aser maongka agütsü. Yisui Zakia taküm indang metetba ama, Pai asen taküm otsü ajunga meteta lir, Pai asen taküm yimya aser asen taginüba meteta lir. Asenoki Pa dang ochishia shidi, Kibuba, ni na nguner. Aiben asenok lokti rongnung külemi Tsüngrem o angar mesüra tamangertem rongnung asenoka shilem agir. Asenoki tangar taküm aser kibong nung Yisui mapa inyakba angashir. Tesem aika nung Yisui sayatenya mapa inyakba asenoki angashir, ajisüaka asenok taküm aser kibong dakbo kecha balaka mekongshir. Iba ama mapang nung Yisui asenok mangu aser memetet amai asenoki bilema alitsü. Tangarbo jungtsür aser tangarbo moatsür, saka asenokbo majunger aser memoatsür ta tezüdanga asenoki bilema alitsüa akok. Ajisüaka, Yisui asenok tiaji ngua dang lir. Pai asenok ajak tenüngteta meteta lir. Lokti tulu nunga Pai asenok repringtetter. Iba ama tezüdanga bilemba mapang, asenoki Yisu angutsüsa tangar tamang dang nungi talila tur atatsüla. Asenok mulungjang nung Pa ngunüba tejangraba, teyongyaba aser tetzüraba alitsüla. Zakia ama takar nisung kati tangar nisung ka repringtsü asoshi süngdongi atutsü maak, David ama chuba ka mulungjang nung Tsüngrem tanüla ajurunüba tetzüraba tulu liasü. Aji oda, parnoki Tsüngrem ajuru. Parnok amaji, asenoki dang Tsüngrem ngunüba bushira, Tsüngremi tama asenok angutsü.

OLEMSABANG

LAISHIBA-i TUYUBA/SAYUBA AROGO INDANG KÜ TANGATETBA

~ L. Kika Pongener.

Ni laishir ka masü layman ka dang. Ni kaket shisatsü tulu azüngba nubu kata masü. Ajisuaka, ni Tsüngrem o angazüktsü aser angatsü kanga janrar aser ano laishiba azüngtsü kanga janrar. Ano ni angazükba nungi aser kü tangatetba nungi nuburtem den lemsateptsü kanga janrar. Ibajagi, ni angatetba nungi, nubur mulong asütsüsa mesuaka, mapang kar nung, Tir Yimyim olemsabang nung ocet zülua tazüngertem den lemsateper. Ni kü ocet nung kanga tongtipang sua zülubaji...Loktiliba melenshitsü, yanglushitsü aser ajungtsü...iba nungji rangloker teimba zülur.


Küm ishika tejaklen, "Centralised Church"...ta jembiba angazük, saka tangbo "Biblical Church Model"...ta kanga bulua jembiba angazüker. Ao oshi nung "Laishiba-i tuyuba/sayuba ama aniba/aliba arogo...English oshi agi "Biblical Church Model"...ta ajar sudi. Ashiko, ni angatetbaji tai asü masü'ar laishir/tashitemeteter (Theologian & Scholar)-temi terajemba ashitsü. Anungji "Biblical Church Model"...Nungja ya tejen lai nungi tasen lai tashi nung bushiyongjia, mesura 'Internet' nung bushiyongjia, ashiko, iba olong ya balaka mejetteta zülua mangutsü sudi. Tang ABAM küpok tenteta aliba lim arogo ajak ya 'Laishiba-i tuyuba/sayuba arogo' (Biblical Church Model) dang lir. Ajioda, lim arogo ajak nung liromedema, laishiba-i tuyuba/sayuba ama aotsü asoshi, inyakyim kar, tang dang nungi tali tajungba melenshia yanglushitsüba, nukjidong nung jembir/inaker sudi...ta angateter. Anungji, tang ABAM küpok tenteta akaba lim arogotem yagi, "Biblical Church Model" inyakyimji agizüka, iba yayim nungji anidaka aoyongjia, arogo tenung aser tanga ajak tang amai küsa dang asütsü. Aji oda, arogo-jia Baptist arogo dang asütsü, saka inyakyim kar nung, laishiba-i tuyuba/sayuba ama tajungba küma yanglushia melenshitsü...Iba dakji alaka ajak küsadang asütsü...ta angateta yudi.

Yisu alima nung alidang, Pai arogo tenzüktsüba indang jangja-janga ashiba angur,. Yisu-i shiogo..."Na Peter, aser iba lung manung ni kü arogo yanglutsü" (Mat-16:18). Saka Yisu kodaki atuba anogo tashi nunga, iba arogo ya metenzüki toktsür pa kodaki ao. Ajisuaka, pai nangzükba ama Tenem-nu Benjong (Pentecost) anogo nung Tanela Temeshi yok, aser nutsüngtem Tanela Temeshi agizüker...Yisui ashiba ama alima nung arogoji tenzüka ao. Aji oda, arogo ya alima nung Tsüngrem'er yimli ka yanglutsüba Tsüngrem nukjidong liasü, aser iba Tsüngrem'er yimli, 'Arogo'-ji Yisu Khrista kinuk-lung (Foundation) ser yanglutsüba Tebu Tsüngrem sentong liasü...ta angateter. Anungji, arogo ya alima sobaliba nung amendaker tentetba lokti-tentet ka masü...ta angateter. Anungji arogo madak tanga bangdak tashi kecha agia kibur küma, teka amuoka anishitsü makok. Iba arogo nung Yisu Khrista Kibur/Tekolak sudaktsür, pai mulongba nung...Laishibai sayuba/tuyuba nung amendaker, aniba/aliba arogo (Bilical Church Model) ka-ka asütsüla...ta angateter.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

'Jesus Calling' kaket zülula aser missionary, Sarah Young süogo



Sarah Young

September 02, 2023: Tekülem aser sarasadem leniba kaket 'Jesus Calling' zülula aser missionary, Sarah Young alima nungi pilaogo; la arrshi küm 77 liasü.

Mission to the World (MTW)-i twitter ajanga, Brihostibar (August 31) nikongdang Sarah Young tesünap nung amozüka ogo, ta metetdaksü.

"MTW missionary aser 'Jesus Calling' densema tekülem leniba kaket aika zülula, Sarah Young asüba osang angashia onoki jashia mangyimer," ta Mission to the World-i metetdaksü.

La nungtem nung September 9 nü Nashville, Tennessee nung aliba Christ Presbyterian Church nung memorial service ka ayongzüka agitsü.

HarperCollins Christian Publishing CEO aser Tir, Mark Schoenwald-i sangdong ka ajanga, "HarperCollins Christian Publishing kibong nung Sarah Young züngsemba ya onok atema tepelatsü aser akhümket ka liasü," ta metetdaksü.

"Sarah ya Tsüngrem kanga meimba tetsür ka liasü. Lai jembiba otem ajanga nübur aika

kongshiogo, aser lai inyakba mapatem ajanga alima nung nisung aika kongshiogo," ta S c h o e n w a l d - i s a metetdaksü.

HarperCollins nung Children's & Gift Book Group tatong tir, Laura Minchew-i, "Young ya tembar tajung ka liasü, aser onoki la kanga menungratsü. Küm 20 jungnüa publishing nung Sarah den külemi inyaksemdang 'Jesus Calling' kakettem ajanga nisung million aika taküm melenshiba ni tejangja metetogo," ta metetdaksü.

Minchew-isa, "Lai züluba kakettem ajanga tammang tia nung alirtem aika kongshiogo, tanurtem dang Yisu indang sayua taküm piyong atema taküm melenshiogo. Sarah meteta la den külemi inyaksemba ya akumli nung maongka tajung ka liasü," ta lemsatop.

Sarah Young-i la kinüngbu aser missionary, Stephen Young den chirnur ana aser semchir ana toktsür pilaogo.

Sarah Young ya 1946 küm aso aser 1968 küm Wellesley College nung graduate asüba sülen St.

Louis, Missouri nung aliba Covenant Theological Seminary nung biblical studies & counseling nung Master Degree renema liasü.

La kinüngbu tenati Mission to the World kübok Japan aser Australia na nung missionary mapa inyak. Mission to the World ya Presbyterian Church in America indang official mission board lir.

Sarah Young-i züluba kakettem rongnung nungtugubaji 'Jesus Calling' lir. Iba kaket nung küm ka piyong (anogo 365) tekülem leniba keta lir. Iba kaket ya 2004 küm sayaba sülen copy million aika yokogo. 2013 aser 2018 küm nung iba kaket ajanga "Christian Book of the Year" award ngua liasü.

Iba kaket kanga takok anguba sülen lai maneni Jesus Calling brand kübok 2021 küm sarasadem leniba Jesus Listens, children's devotionals aser Bible storybooks zülua liasü.

Taoba hopta Thomas Nelson Publishers-i sangdong ka ajanga, Sarah Young temang kanga tamajungba dang akümer, anungji ajak dang la atema sarasademjang ta mepishir, ta metetdakja liasü.

Nigeria nung putir Paul Sanogo aser missionary, Mahinini na chiokogo

September 02, 2023: August ita tetenzüklen Nigeria kübok Middle Belt nung Khristan putir ka den missionary ka na apuba sülen tawa chiokogo.

Khristan putir Paul Sanogo aser Missionaries of Africa nungi Melchior Mahinini na August 2, 2023 nü Niger state kübok Minna Tenla kidang lia kari puer ao, ajisüaka tenaprongla August 23 nü chiokogo, ta Catholic charity Aid to the Church in Need (ACN)-i metetdaksü.

Missionaries of Africa in Ghana-Nigeria nung provincial superior, Dennis

Dashong Pam-i, "Puer aoertem ket nung tena timtema aruaka tenaprongla junga dang lir," ta metetdaksü.

"Ni kanga pelar; onok melung süngzüko. Onoki parnok kibongtem atema aria bilemja liasü aser hopta asem tashi amoi-a mouteti liasü. Tena chiokbaji ajanga nenoki sarasademtsüba aser nungita yariba shisangdaksür," ta paisa metetdaksü.

"Sen angutsü lenmang tezübabaji tangar melung yirudaksüba ajanga lir, ta bilemertem melung meyiptsü atema onoki

sarasademtsür," ta paisa shisem.

Taküm küm tenzüker tang tashi nung Nigeria nung Arogo lenir 13 puogo aser parnok ajak chiokogo, ajisüaka yaküm apuba putir asembo tang tashi mangur aser yaküm apuba putir anabo tepsetogo, ta ACN-i metetdaksü.

2021 küm January ita nungi 2022 küm June ita tashi nung Nigeria nung Khristan 7,600 dak tema tepsetogo aser Khristan 5,200 shi puer ogo, ta ACN indang '2022 Persecuted and Forgotten?' report ajanga metetdakja liasü.

ANOGO ABEN TSÜNGREM DEN

TEMALEN NUNGI TEYARI

"Ni kü nük temaleni rangketa yoktsü, kolen nungi kü teyari arutsü. "

~T.Ken 121:1.

Tzüyim nung jajar tanishir tasen asüandang rong tejen nung inyaksü mapa tasaktibaji azüklen jagi soa atutsü aser rong anishiba temesangba sü salatsü mesüra yanglushitsübaji lir.

Onzüa aliba süngzü nung azüki soa atutsübaji, tasü ait-mait tetendangba aser tangazükba tulu angutsü atema liasü.

Ajungbena rongji yipru mopung tulu agi nungshia anakshidang, temesangba süitaka aliba salatsü tasaktiba lir.

Captaini yamala rong anishir tasenpur dang teti ashiba o kaji, na aoksaatokra aser tsübuatokra, teküboklen tereprang, saka azüklen dang repringang. Tanü asenok ajak asoshi iba ama tatishitsü shisatsü o kanga tongtibandang lir. Kodang timtemi asenok tongdir aser kechi inyaksüar memeteti ratamadar, asen timtem nung masü saka Kibuba dak rangloktsü aser pa dang teyari asüngdangtsü mamatokli.

Kibuba dak rangloktsüji teinyaksü rongnung shisa takatiba lir. Tanü yamala tia ka nung na jajaa lira, nai teküboklenji tereprang, kechiaser teküboklenji repringra, nai tetsübutsüjiang jangjaa angutsü, saka temalen kodang rangketa yokdir ne teyari tematiba Tsüngrem nungi arutsü.

SARASADEM

Kodang tetsübui ni menepdir; ni Ne dak dang ranglokdi. Amen

Vietnam nungi Khristantemi Pope ajurutsü atema Mongolia-i ao

Ulaabaatar, September 02 (Agencies):

Tang Pope Francis-i Mongolia linük semdanga aliba mapang nung Vietnam nung Khristan aikati Pope Francis ajurutsü atema Mongolia-i oa lir; parnoki Pope dang Vietnam linük semdangang ta mepishitsü.

Honibarnü (September 2) Ulaabaatar yimti nung aliba Tenla kidang linük balala nungi nisung 2,000 dak tema adenshia alidak Vietnam nung Khristantemi "Vietnam semdangang, Oba" ta ayimdena liasü.

1975 küm Vietnam War tembangba sülen Communist yimsüsüba kübok Vietnam-i Vatican den tesendaktep raksaa liasü.

Vietnam nung Khristantemi Pope Francis nem Vietnam

semdangdaksünü yonga ibaji tamakoktsü liasü ajisüaka taoba ita Vatican aser Vietnam nati Hanoi Resident Papal Representative ka ayutsü bangjemba sülenbo Pope-Mongolia-i oa lir; semdangtsüji takoktsü ka kümogo.

Taküm July 27 nü Vatican nung Pope-i Vietnam Tir, Vo Van Thuong agizüka liasü. Vietnam nung Khristan kati, "Kobi melii pai Vietnam semdangtsü, ta ni imlar. Tiri Vatican semdangba ajanga teimla agütsür," ta ashi.

Philippines nung alir Vietnam tsür Khristan, Maria Vo-i, "Tang ni pelaba ya ni rasa-a meshitettsü. Tang den mezüng ni Pope nguogo. Vietnam nungertemi pa meimer aser pai Vietnam semdangtsü onoki semdangtsü yongyar," ta metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Sadang

(v) ana küma lemdang (divide into two)

* Onoki apuba ango sadanger teimbalen parnok nem agütsü.

Sadang

(n) nokdang, tzü temdangba (water parting)

OLONG PAITEP # 6624

1			2		3		4		5
6		7							
					8				
9				10					
						11			
			12						13
	14								15
					16				
			17						
								18	
19									

TIPIEN

- 2. Teburtemi tejak nung awaba
- 6. T _ _ _ em
- 8. Tzük ayudak
- 9. Nüngdakba dang timba
- 11. Züina ao
- 12. Yangi tzü angur
- 14. Tangar dang nungi tali
- 16. Senyong masü
- 17. Oadokdi
- 18. Tzü tarok
- 19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
- 3. Nisung ka mapa inyaksü nübo
- 4. Azüntsü asoshi mejemba
- 5. Tesangwa agütsüba
- 7. Tila masü
- 10. Tebenjem tetsür chanu
- 11. Tekolak nung inok
- 12. Tetsüngda
- 13. Tangar inyakba ka inyak
- 14. Tim masü ta ashi
- 15. Asalendong
- 16. Tanü dangtsü

OLONG PAITEP # 6623 TELANGZÜBA

TIPIEN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso

LANGTSÜNGLEN :

- 1. Alumang, 2. Pongen,
- 3. Samaru, 4. Tenüng, 6. Pio,
- 9. Nüngdak, 10. Yongya,
- 11. Kongro, 13. Sorkar, 14. Ata



AZÜMESEN JABASO KA :

Jabaso kangasa azümesen asübayong tetsüi aiben shiaka memelenshiba agi otsü ka ashir.

Tetsü : Talak sakang, ojalai langka shidi.

Posü ozü kibong ana liasü, kibong kabo yakta saker chiyimi aodangji mesen aika ayazüya alibatemi tebok sünga chili asü, saka tangabar kibongtobo kanga menurang sakerji kecha mesena mata, anogopiyong yaseta kazüli asür. Sürapangla talak, nai kechi angazüker iba otsü nungi?

Jabaso : Koba mesen anepdang yakta saker nemzür parnokji lendong.

~ Lilir : WhatsApp

Manipur: Kuki Inpi-i ayongzüka Moreh nung longkak ait



Imphal, Rongjui/September 2 (Agencies): Kuki-Zo kin nungi nisung 4000 dak temai Honibarnü Manipur nung Moreh kübok Galngam Lentoul tesem nung mener longkak aitba sentong ka ayongzüka agiogo. Longkak aiterem ya timba tetsürtem liasü. Iba longkak aitba sentong ya Kuki Inpi, Tegnoupal District (KIT)-i ayongzüka agia liasü. Manipur nung azütokshi lendong ataloker aliba dak sendakba nung yimden yimsüsüba tsütsü ken o bentettsü khanga parnoki longkak aita liasü. KIT otongdar Kaikholal

Haokip-i ashiba agi, yimden yimsüsüba tsütsü ken o mebentet tashi Moreh jila nung Meitei nungertem lidaktsütsü asoshi jenjang agiba Kuki-Zo kini magizüksü. Paisa, state sorkar policy tamajungtem anema iba longkak aitba sentong ya ayongzüka agir, ta ashi. Kin ana tsüngda mangatettep adoka Moreh jila nungi Meitei nung 3,000 dak tema jena aoba sülen tang iba longkak aitba sentong ya ayongzüka agiogo. Mepetmesü ya Kuki-Zo aser Meitei kin tsüngda ali dak sendakba nung mangatettep adokba sülen

tenzük. Haokip-i ashiba agi, Kuki-Zo kini, mangatettep adokba tera bentettsü atema yimden yimsüsüba dak sendakba nung telemtetba ka asoshi aser Manipur nung kin ajak nem kasa temeden agütsütsü akhanger. Paisa, yimden yimsüsüba tsütsü tangatettep ka dangi aruba sülenang Moreh jila nung Meitei nungertem tanaben lidaktsütsü, ta ashi. Honibarnü longkak aitba sentong ta yimjung nung agiogo. Kin ana tsüngda mangatettep adokba ajanga Moreh jila nung teraksatsüba aika adokogo.

Assam: Bajali nung rakzükkrakdemba atema police 5 apu

Guwahati, Rongjui/September 2 (Agencies): Bajali district nung kozü (supari) shishilembar ka dang nungi rakzükkrakdemba atema aija aliba Assam police personnel tem Honibarnü puogo. Aija aliba police personnel tem ya parnok anema ken o benokba sülen CID-i puogo. Pua aliba police personnel tem ya Bhawanipur Police Outpost IC Debajit Giri, ASI Sasanka Das, ABC Injamamul Hassan, Bajali SP indang driver Deepjoy Roy aser home guard Nabir Ahmed ta jangaogo. Temetettsükaji CID-i Hokolbarnü iba ken o dak sendakba nung Guwahati kübok Ulubari nung amenoka aliba parnok indang head office nung police tenet sota yua liasü. Source kati ashiba agi, item ketdangsürtem ajak ya Bajali district nungi liasü. Kozü shishilembar kati ken o ashishiba sülen bushisüngdang ya August ita tetenzüklen tenzüka liasü. Iba sülen August 31 nü CID-i, aija aliba police

ketdangsürtem anema Indian Penal Code (IPC) kübok section balala dak ajemdaker criminal case ka benoka liasü. Aija alirtem ya ken o ashishitsü atema CID dangi anir arua liasü. DGP GP Singh-i ashiba agi, iba ken o jangjatsü atema sang sua yur ketdangsürtem aputsü asoshi Directorate of Vigilance & Anti-Corruption nem nongloktsü. Ketdangsürtemi kanga kümdanga inyaksangshiba ajanga mezüngbo iba tasa ya takok mongutet. Paisa, iba sülen bushisüngdang balala ajanga ken o janga aküm aser section balala dak ajemdaker CID PS case ka benoka liasü, ta ashi. CID office-i anir aruba police ketdangsürtem rongnung DSP (HQ) Puskal Gogoi, SI Anup Jyoti Patiri (Officer-in-Charge, Patacharkuchi Police Station), SI Debajit Giri, ASI Sasanka Das aser Constable Injamamul Hassan den home guard Deepjoy Roy aser Nabir Ahmed nung densema liasü.

Parnok rongnung Injamamul Hassan ya taoba Bajali ASP (HQ) Gayatri Sonowal indang Personal Security Officer (PSO) liasü. Ajisüaka parnok pongu Honibarnü puogo aser parnok rongnung ana tang bushisüngdangdar. Aija alirtem yagi kozü shishilembar ka dang nungi sen crore 3 meshia liasü. Police ketdangsürtem yagisa pa aibela tepsetba ama tepseta toktsütsü amokmerena liasü. Shishilembar yagi parnok nem sen lakh 10 bo agüjatokogo. Police tem yagisa pa dang jenjang tasak indang gari asem alitsütsü takhangba agüja liasü. Police temi pa maneni amokmerenba sülen pai temaba jenjang nung aliba ketdangsürtem aser anti-corruption bureau nem iba ken o metetdakja liasü. Tashishiba dak ajemdaker ken o maneni bushisüngdangtsü atema parnok ya CID office-i anir arua liasü.

Manipur: Mejangjaba nisungtemi NH-37 nung apu ka poksatsütsü merang

Imphal, Rongjui/September 2 (Agencies): Manipur kübok Jiribam district ajanga Imphal aser Assam nung Silchar na sendaktepba NH 37 nung mejangjaba nisungtemi culvert apu ka nung bomb ana pokdakja iba apu poksatsütsü meranga liasü. Iba apu ya bomb agi terabo raksatsüogo, ajisüaka apu nung garitem maneni senzüsenpongdar. Iba apu ya Kangpokpi district nung Keithelmanbi police station kübok Longa Koireng aser Beiji yimtsüng na yongtsü nung Leinganglon tesem nung yanglur

liasü. Iba yimtsüng ana nung alirtemi bomb apokba ola angashia liasü. Iba tesem nung bomb ngutetogo. Bomb pokdaksüba ajanga iba apu kübok track nung tapok adokogo. Police-i ashiba agi, detonators amshia iba apu poksatsütsü meranga liasü aser aibelena alirtem yakta aputsü. Tang tashi nung iba apu poksatsütsü merangba indang telok kati dang nanzüka mali. Manipur nung Committee Tribal Unity (COTU)-i Imphal Silchar aser Imphal Dimapur ta

National Highway ana nung mapang telatet ka makai rongsenketzung nung tenokdangba agütsür aliba mapang ka nung tang iba apu poksatsütsü merangogo. COTU-i, Manipur nung Kuki-Zo kintem aliba tesemtemi tenüngdakba osettsütem shitak yoktsü khanga arudar. Assam aser Nagaland nungi Imphal-i khu bener aoba tata gari 300 shi Nagaland den arrtsü nung NH 02 nung bangdaka lir. Iba tesem nung police-i security akangshitsüogo aser apu poksatsütsü merangertem aputsü atema bushiba mapang ka lir.

Election agitsü kecha aritepa mali: Gabon coup lenir



Tir Ali Bongo Ondimba atsüngtoksang presidential guard tekolakba General Brice Oligui Nguema, Gabon nunger sepaitemi anir aoba noksa nung angur.

Libreville, Rongjui/September 2 (Agencies): Civilian sorkar nem tashi meyipa agütsü atema nongshiba mapang Gabon tir Ali Bongo atsüngtokba coup lenir-i ashiba agi, pai election aritepa agia taoba mapang ama aibelen mesüner.

General Brice Oligui Nguema-i anir military ketdangsürtemi Bodhbarnü sorkar atsünga liasü. Bongo-i election tasembuba term akokba sangdongba sülen minute ishika dang lir military-i sorkar atsünga liasü.

Ketdangsürtemi Bongo par kidang sabanga ayu aser state teloka asütsü asoshi Nguema shima liasü, iba ajanga Bongo'er kibongi Gabon küm 56 tashi yimsüsüa aruba tembangdakja liasü.

Military-i sorkar atsüngtokba ya linük yimtiba Libreville nung nübürtemi yimti yimtung nung pelatepa agizüka liasü, ajisüaka linük nunga nübürtem aikati iba ya aitsüogo aser bendangertemia aija arudar.

"Onok nükjidingji takaratiba nung tejakleni aotsü asoshi lir saka jangjarang aotsü. Takaratiba nung tejakdangi aotsü ta asüba tetezü election aritepa agitsüba masü. Election kanga aritepa agira kasa aibelen menatsü kong kasa nisungi maneni yimsü asütsü aser taoba mapang ama kasa dang akümtsü," ta Nguema-i Hokolbar anung ashi.

Regional bloc; Economic Community of Central African

States (ECCAS)-i, United Nations aser African Union-i anir partner tem dang linük nung temzüng özüng maneni benoka inyaksangshitsü atema teyari agütsütsü mepeshia metetdaksüogo. Brehostibarnü senden ka amenba sülen parnoki iba temepeshiba ya agüja liasü.

Gabon nung opposition party tongtiba Alternance 2023-i, parnoki election kokogo ta ashiba den alima kin tem dang civilian nem tashi meyipa agütsütsü atema general tem ajungshitsü mepeshia metetdaksüogo.

Bongo ya 2019 küm shim aser pai tebu melena liasü, shibai 1967 küm nungi linük yimsüsüa aruogo. Opponent temi ashiba agi, Gabon indang totzü aser mining ajanga aazükba sen ya ajak kasa alemtsü atema par kibongi jenjang tapet magi.

Küm aika Bongo, Atlantic tzüyim kümbang nung aliba palace nung lia aruogo. Parnok meyong France aser United States sen tasak jenjang gari aser kiojentem lir aser item alizüktsü atema parnok yimya agi sen (cash) dang agüja liasü, ta the Organized Crime and Corruption Reporting Project-i 2020 küm bushisüngdangba sülen nguteta liasü.

Kasa mapang nung linük nung nütsünyongsük million 2.3 aliba nungi timba sensak tia nung lir.

Senotsü ochi meshi amshiba aser temesepba mozü shibelenba dak sendakba nung

military lenirtemi Bongo'er jabaso, Nouredin Bongo Valentin aser Bongo indang cabinet züngsemtem aika apütsü tetuyuba agütsüogo.

State broadcaster Gabon 24-i Brehostibarnü sangdong ka ajanga ashiba agi, ketdangsürtem kidang nungi plastic agi aleper yangku nung sepa yur aliba sen ngutetogo. Parnoki lemsatepba footage nung taoba mapang cabinet director Ian Ghislain Ngoulou'er ki meita aoba sayuogo.

Bongo Valentin matsüngdang nokdaker, pai channel dang ashiba agi, sen ya Bongo indang election fund lir. Iba noksa ya kodang tangok iba indang osang tejangja memetet.

Bongo kinungtsü Sylvia indang okatsüri Hokolbarnü ashiba agi, Bongo Valentin ya mejangjaba tesem ka nung sota yua lir aser pa kümzüka ali mali iba dak sendakba nung par kinungertem tebilemtsü akar.

"Sorkar tashi melenteptsü aser iba dak alia state achaayangtsü atema yimden yimsüsürtem nungdaker," ta Libreville nung alir Timothe Moutsinga-i ashi. "Onoki iba temelenshi aser sorkar dak nungi aika imlar aser civilian nem tashi meyipa agütsütsü imlar," ta paisa ashi.

Guinea, Chad aser Niger nung aser 2020 küm Mali aser Burkina Faso nung military-i sorkar atsüngba sülen tang Gabon nung military-i civilian sorkar atsüngtokogo.

MOLUNGNEN LEMSATEPER



Asür Er. S. Meren Imsong (Unger)

Tasoba: 10.11.1947 ~ Tasüba: 22.08.2023

Onoki teti dang meima aliba Obala/kinüngbo

Er. S. Meren Imsong (Unger) iba lima nungi pilaba mapang özü kibong den asükho lemsatepa nübo, rongsen, shisatsü aser sarasadem ajanga kija aser kibongi özü den yaritepba asoshi kanga pelaba iba sapang ajanga lemsateper. Tsüngremi nenok kija aser kibong, Arogo, lokti tentet balala maneni moajang ta özü sarasadem.

~ Temeim kinungtsü, jala jabsotem aser kinungertem.

North Korea-i cruise missile tendanogo: South Korean military

Seoul, Rongjui/September 2 (Agencies): North Korea Korean Peninsula anüolen tzüküm nungi tzüyimleni cruise missiles aika khaketa yokogo, ta South Korea indang military-i metetdaksüogo.

NK anütok tzükümlen nungi ballistic missiles ana khaketa yokba sülen anogo ishika dang lir Honibarnü North Korea-i item missile tem khaketa yokogo. North-i ashiba agi taoba mapang missile tendangba ya nuclear amshia South Korea nung tesem balala amaksü asoshi terenemshiba ka lir.

Yellow Sea leni missile khaketa yoba ya tang South Korea aser United States intelligence ketdangsürtemi asadangdar, ta South Korea indang Joint Chiefs of Staff-i sangdong ka ajanga metetdaksü.

Joint Chiefs-i ashiba agi, South Korea military-i iba tensa kanga junga asadangdar, ta South Korea indang Yonhap News Agency-i metetdaksü.

"United States den longjemer onok indang military kanga junga renema lir," ta joint chiefs-isa metetdaksü.

North Korea-i Brehostibarnü ashiba agi, parnoki South Korea

nung military command centre aser tayimtsü anendak amaksü atema renemshiba ka ama short-range ballistic missiles ana tendanogogo.

South Korea aser US sepaitem anogo 11 Ulchi Freedom Shield military drills ayongzüka agiba atema tang North-i item missile tem tendanga telangzüba agütsüogo. North-i ashiba agi, Seoul aser Washington nati exercise balala ayongzüka agiba ya parnok amaksü atema terenemshiba ka lir, ta shia arudar.

Military exercise ayongzüka agiba mapang US indang long-range B-1B strategic bomber ka Korean Peninsula kolak nung yimzudakja liasü. Iba exercise ya Hokolbarnü tembang aser kasa anogo South Korea-i, taoba ita space rocket ka tendangba dak sendakba nung North Korea nunger pongu aser company ka nem tenokdangba balala agüja liasü.

United Nations bangzüng ka ajanga ballistic missiles metendangtsü atema North Korea nem tenokdangba agütsür liaka Pyongyang-i taoba küm missile aika tendangogogo aser taküma aika tendangtsü renema lir ama repringteter.

DRC nung China nunger ana densema nisung 4 tepset

Kinshasa, Rongjui/September 2 (Agencies): Democratic Republic of the Congo anütoklen hon bena aliba convoy ka amakba sülen China nunger ana densema nisung pezü tashi tepsetogo.

Hokolbarnü TSM Mining compang indang gari pezü South Kivu province kübok Fizi tesem nung Kimbi ayong anasa aliba hon atudak tesem ka nungi hon bener oya aliba mapang mendanga atar maka liasü.

Iba convoy amakertem yagi gari nung bena aliba hon ya ayua aser jena oatok, ta Fizi nung ketdangsür Sammy Badibanga Kalondji-i ashi.

Iba lendong nung asürtem rongnung DRC nungi sepaia ka

aser gari anir ka densema liasü. Kalondji-isa, iba lendong nung ano China nunger mine nung inyaker ka, local ana, sepaia ka aser mine nung inyaker ka yirua liasü ta metetdaksü.

Iba convoy amakertem ya kidanger tesem Maniema nungi liasü, ta paisa metetdaksü.

China ya Democratic Republic of the Congo nung investor rongnung tongti ka lir aser parnoki rongsen aika aketba mineral mining industry amokbanger lir.

South Kivu nung telungpur telok balalai tesem aika maka arudar aser iba den China nunger indang mining firm tem aser local tem tsüngda mangatettep adoka arudar.



Washington: Indian-American Republican presidential candidate Vivek Ramaswamy-i ashiba agi, Russia-i China den military tsütsü tesendaktep yanglur aliba tembangdaksüdsüra Russia aser Ukraine na tang rara aliba rara ya tembangdaksüner. Ramaswamy-i ashiba agi, China-i amokmerenba ya bentettsü kanga tongtibang aser Russia-a Beijing küboki maitsüji kanga tongtibang lir.

Mkg. nung 35+ Mokochung Friday League, Season 4 tenzükogo



35+ Mokochung Friday League, Season 4 tenzükba sentong temer kelen mezüngbuba match asayatsüpur Revenant FC aser Terokroker FC telok den Match Patron aser achayangertem külemi tangokba noksa.

Mokochung, Rongjui/September 02 (TYO): Imkongmeren Sports Complex Mokochung nung 35+ Mokochung Friday League, Season 4 tanu tenzükogo.

Tanu mezüngbuba asaya taoba nung 35+ Mokochung Friday League Season 3 prongla nung Champion Revenant FC aser Terokroker FC tsüingda asaya aser iba asaya nung Champion Revenant FC- goal-1 aser Terokroker FC- goal-1 ta agutsütepa kasasa nung tembang.

35+ Mokochung Friday League, Season 4 tenzükba nungtem nung sentong tatsüka

agiba mapang nung Match Patron Chuba Phom-i mapang tatsüka agia jembidang 90's mapang Nagaland nung Football tournament balala nung asayatsü asoshi asayar tajung bushidang Mokochung nungi dang asayar tajunggi agia liasü, saka tanu reprangdangra Mokochung nung football asayar tajung mangur, anungji kanga dang sasasete ya kechisüta bilemerta ashir.

Match Patron Chuba Phom-isa asayatem dang kum 35 aser temapurji tetemjen mapang ka lir, aji asünung lanurtem dang football asayaba ajanga tatishitsü tajung sayuba

lanurtem ajungshia football asaya meimdaktsütsü inyakdi aser ibaji ajanga Mokochung akhi mapang nung football asayar tajung aika aliba ama adokdaktsütsü merangdita ayongzük.

Tanu iba sentong nung Dr.Lanu Walling ajanga 35+ Mokochung Friday League Season 4 buba tashi agia aruba nung tatalokbatem lemsatepa aser Technical Convenor Imliwapang ajanga asayatem tenangzükba agidaktsüba den sentong nung Tsüingrem lenisüba jazüka sarasadem aser Imlitemüsü ketdangzüba nung iba sentong agia liasü.

Nagaland Athletics Association-i parnok inyakyim metetdaktsü



Nagaland Athletics Association-i osangbenertem den sensaksemba noksa nung angur.

Dimapur, Rongjui/September 2 (TYO): Nagaland Athletics Association-i parnok inyakyim tem metetdaktsütsü asoshi September 2 nü Kohima nung Nagaland Olympics Association office nung osangbenertem den sensaksemba sentong ka ayongzüka agiogo.

Sensaksemba mapang Nagaland Athletics Association tir Abu Metha-i Nagaland nungi asayartemi takok tajung angubattem indang metetdakja liasü. Athletics Federation of India koba India nung sports associations tejentiba rongnung ka lir iba den medemdanga jembiba mapang Metha-i, NAA ya-a Nagaland nung association tejentiba rongnung ka lir ta ashi.

Takok indang jembiba mapang pai, South Asian Cross Country Championships aser 56buba National Cross Country Championships, 2022 kanga takok ngua ayongzüka agiba indang lemsatep. Iba asayamung nung Nagaland tetsür team-i bronze medal ngua liasü. Metha-isa, doping tests aser tanga ken o tem asadanga sülen Nagaland team nem silver medal agütsü kechiyong silver medal anguba

team yagi tetendangba majangtet, ta ashi.

Kasa mapang nung Nagaland nungi asayatemi taoba North East Olympics nunga takok tajung ngua medal 23 nguogo, kong under 20 jenjang nung tetsür aser tebur naprongla Best Athlete naroküm agizüka liasü.

Iba asayamung atema asayartem Kohima nung training kanga junga agiogo, kong Athletics Federation of India-i yokba High-Performance Coach temi tangazükba balala agüja liasü. Metha-isa, iba asayamung nung takok tajung ngutetba ya training camp tem kanga junga ayongzüka agiba ajanga lir ta ashi. Maneni pai, asayartem nem coaching agütsüba, seminar balala ayongzüka katsüba aser techinacal ketdangsurtem nem training agütsüba densema Athletics Federation of India-i teyari tulu agütsüba atema kanga pelaba lemsatep.

Nagaland Athletics nükjidongji, tarutsü nung takok angurtem anitetsü asoshi coach aser technical ketdangsurtem aika anitetsü asoshi lir, ta shia Metha-i, coaching aser technical

officiating janrartem dang parnok indang workshop aser seminar tem nung shilem agitsü ajungshiba den Physical Education tesayurtem, taoba mapang asayartem aser tanga discipline nungi coach tem item sentongtem asoshi pelashishia jaokba lemsatepa liasü.

Maneni Metha-i Athletics Federation of India-i Nagaland Nagaland Athletics dak tamang akaba lemsatepba den pa Mountain Running Committee mendenbuba asütsü shimba indang shisem.

Medal aika bener aruba dak ajemdaker Nagaland Olympics Association-i, Nagaland Athletics Association nem best-performing sports association naroküm agütsügo.

Metha-i, Cross Country Championships mapang Chief Minister-i teyari agütsüba atema kanga pelaba lemsatep. Paisa, Nagaland nung tongtibang asayamungtem takok ngua ayongzüka asayatsü asoshi tashi aliba sayuogo aser state nung asayamung tali ayongzüka asayatsü atema Nagaland Athletics sentong lir ta shisem.

Annual General Meeting nung Nagaland Athletics ketdangpur tasentem shimogo. Ketdangpurtem rongnung; President Abu Metha, Senior Vice President Khriehutuo Tsira, Vice Presidents Wennyei Konyak aser Dziesebienuo Vizo, Secretary Mhonsao Nguillie, Treasurer Neingulie Nakhro, Senior Joint Secretary Purna Konyak, Joint Secretaries Asakho Joseph aser C. Tongen Thai, aser Ex Member Khriezotunuo densema lir.

Bhubaneswar & Guwahati nung India FIFA World Cup qualification asaya asayatsü

Rongjui/September 2, 2023

(Agencies): India football team FIFA World Cup 2026 aser AFC Asian Cup 2027 Preliminary Joint Qualification Round 2 asaya ana Bhubaneswar aser Guwahati nung asayatsü, ta All India Football Federation-i Hokolbarnü sangdong ka ajanga metetdaktsügo.

Asian qualifiers nung India team Group A nung Qatar, Kuwait na den ata lir aser Afghanistan aser Mongolia na Preliminary Joint Qualification Round 1 asaya asayaba sülen shiba kokdir iba telok nung tanabuba round atema adentsü.

India team mezüngbuba asaya Kuwait den November

16 nü asayatsü aser iba sülen November 21 nü Bhubaneswar kübok Kalinga Stadium nung AFC Asian Cup champions ta tesüsa koker aliba Qatar team

den asayatsü.

2024 küm India team Afghanistan mesüra Mongolia den March 21 nü away asaya ka asayatsü aser iba sülen kidang Guwahati kübok Indira Gandhi Stadium nung March 26 nü tanabuba asaya asayatsü.

"Qualifying asaya ayongzüka asayatsü atema takok ngua bid asüba atema onoki Football Association of Odisha aser Assam Football Association nem tenüngsang agütsür aser state sorkar teyari nung item asayatem ya temaba jenjang nung takok ngua ayongzüka asayatsü asoshi imlaja atar," ta AIFF secretary general Shaji Prabhakaran-i ashi.

India nung Kuwait den June 6 nü asayatsü aliba ya kong asayatsü iba indang mapang tatsü ka lir metetdaktsütsü, ta AIFF-isa metetdaktsügo.

Spain nunger defender Jordi Alba international asaya nungi anenogo



Jordi Alba

Rongjui/September 2, 2023

(Agencies): Spain nunger defender Jordi Alba-i, pa international football asaya nungi anenba sangdongogo, ta Spanish football federation-i Hokolbarnü metetdakja liasü.

Taoba mapang Barcelona nungi left-back asayar shiba tang United States nung oa Inter Miami nungi asayadar pai, June ita Spain team-i UEFA Nations League akokba nung teyari tulu agüja liasü.

Alba ya Spain national team nungi mezüng 2011 küm asaya. Pai Spain tenüng nungi asaya 92 nung shilem agiogo aser iba mapang goal teku tashi idakja liasü.

Spain team nungi asayaba mapang pa asoshi ajak dang tongtibangtiba asayaji Italy den

Euro 2012 final asaya ya liasü. Iba asaya nung pai par team asoshi goal ka idakja Spain team-i European Championship title abenba nung teyari tulu agüja liasü.

National team nungi kanga takok ngua asayaba atema RFEF (Royal Spanish Football Federation)-i pa dang kanga pelaba lemsatepogo.

"Spanish football federation tenüng nung nai linük asoshi kanga junga asayaba atema tenüngsang agütsür," ta REEF-i ashi.

Spain team nung left-back position nung asayatsü asoshi sempet tajung aketba asayartem aika lir aser Barcelona nungi asayar Alejandro Balde-i pa melentsü imlar, shibai Barcelona nunga pa melenogo.

BILEMDANGANG

"Nai lenmang kecha mongutetra tasen mesapokang."